



Umhverfis- og auðlindaráðuneyti
Skuggasundi 1
101 Reykjavík

Reykjavík, 1. febrúar 2021

Efni: Umsögn um áform um frumvarp til laga um breytingar á lögum nr. 70/2012 um loftslagsmál

Samtök iðnaðarins (hér eftir „SI“ eða „**samtökin**“) vísa til máls nr. 10/2021, og birt er á samráðsgátt Stjórnarráðsins, þar sem kynnt eru til umsagnar áform um frumvarp til laga um breytingar á lögum nr. 70/2012 um loftslagsmál (markmið um kolefnishlutleysi). Í umfjöllun um málið inni á gáttinni segir að áformað er að leggja fram frumvarp til breytinga á loftslagslögum þar sem markmið ríkisstjórnarinnar um kolefnishlutlaust Ísland árið 2040 verði lögfest. Það er í samræmi við markmið um kolefnishlutlaust Ísland árið 2040, sem sett er fram í Stjórnarsáttmála ríkisstjórnarinnar og kemur einnig fram í aðgerðaáætlun í Loftslagsmálum sem útgefin var árið 2018 og aftur 2020. Þá segir einnig í umræddri kynningu að kolefnishlutleysi er lykilþáttur í Parísarsamningnum og nauðsynlegt til að ná markmiði samningsins um að halda hnattrænni hlýnun jarðar innan við 2°C og eins nálægt 1,5°C eins og hægt er. Þá er gert ráð fyrir nánari útfærslu á því með hvaða hætti markmiði um kolefnishlutleysi verði náð árið 2040 í vegvísi sem stjórnvöld munu vinna í víðtæku samráði.

Samtökin gera ekki sérstakar athugasemdir hvað framangreind áform varðar að svo stöddu máli enda liggur ekki fyrir með hvaða hætti boðaðar breytingar munu raungerast í drögum að frumvarpi eða hver áhrif þeirra breytinga kunna á hafa á aðildarfyrirtæki samtakanna. Að gefnu tilefni óska samtökin eftir að koma á framfæri hvatningu til umhverfis- og auðlindaráðuneytis að huga að samráði við hagsmunaaðila þegar drög að frumvarpi verða unninn á vegum ráðuneytisins.

Í þessu samhengi benda samtökin á að víða hafa fyrirtæki stigið jákvæð skref fram á við í breytingum á framleiðsluferlum, vörulínum, starfsháttum og öðrum þáttum í starfsemi sinni til að lágmarka áhrif á umhverfi og draga úr losun á gróðurhúsalofttegundum. Því er að mati samtakanna mikilvægt að byggja ofan á reynslu fyrirtækja og draga lærdóm af þeim aðgerðum sem fyrirtæki hafa ráðist í á þessu sviði. Að sama skapi telja samtökin mikilvægt að tryggja samtal atvinnulífs og stjórnvalda til að greina hindranir sem í vegi eru og koma fram með lausnir í þeirri vegferð að stefna að kolefnishlutlausu Íslandi árið 2040.

Gera SI að öðru leyti ekki frekari athugasemdir um mál þetta að svo stöddu máli. Er framangreindum ábendingum hér með komið á framfæri við umhverfis- og auðlindaráðuneyti.

Virðingarfyllst,

Lárus M. K. Ólafsson,
sérfræðingur á sviði umhverfis- og orkumála